


書名 空同先生集六十三卷 嘉靖九年序刊本
撰者 明 李夢陽 撰
卷 卷六十二
內容分類 集 別集 明中葉
索書號 倉石:40084
編號 4008000

卷六十二



空同先生集卷第一

賦一十首

疑賦

思賦

省愆賦

緒寓賦

侯軒子賦

十首

疑賦

乾
坤
高卑易矣
星辰在
下江河
逆矣天
喬喬天

北郡李夢陽撰

鈍賦

述征賦

宣歸賦

寄兒賦

竹石賦



空同先生集卷第六十一

空同先生集卷第六十二

北郡李夢陽撰

文 書一十七首

奉林公書

奉邃庵先生書十首

與何子書二首

與李道夫書

答左使王公書

報吳獻臣書

與王獻可書

書一十七首

奉林公書

愚生也晚不幸不獲侍公然又私幸漑公之餘波凡聞公一言一行真如覩景星瞻喬岳寤寐向往以標

以趨而愧莫之能也所委序詩之文力綿才辱實莫
敢承而札教屢及豐貺接至夫學非子夏孰引毛詩
識殊元凱胡增左氏將筆復輟竟自遲疑屬石峰藩
使尅日北行有僮南返因自竊計大賢知遇義難卒
孤卽文之弗佳亦鄙人請益之端也用是弗揣輒作
林公詩序一篇言或過當離經垂義就便黠鼠敢不
拜公之明惠

奉邃庵先生書十首

某不肖不能抑則懿矩諧世寡術積誠弗著動輒獲
咎貽父師寤寐之憂然私懷種種徒抱瞻戀而莫敢
輒上一書者以物議未白爲門墻羞也今送門子造

僞重二事勘官勘咸有下落無我干矣人人稱慶以
爲天道至公而勘官心反不悅乃淮人奏我事咸勘
實江奏我事咸勘實吳奏我又咸勘實而我奏江與
劉喬事則咸勘我虛揚言曰不如此無以塞科道之
口而快其心某謂前二事旣明白諸亦聽之而已不
復與之辯而勘官猶云中之不深乃於勘文外移文
各府縣廉我陰事某自保曾參決不殺人料亦無事
可廉也即有之不過害我作官耳彼旣不能害我作
人他非所憂矣某自沾餘馥以來廿年于茲矣恒懼
玷點名教愆違訓旨每以不欺師君實不以死生富
貴動心法希文而攬轡澄清則欲效孟博之爲不意

世莫我知百大吠聲千人傳虛凡所振紀綱懾權貴
興禮教作士氣起廢舉墜拔冤伸枉植善鋤強皆置
不說而妬者目爲生事異者倡爲尚氣仇者指爲奸
邪私者誣爲善訐排者劾爲不謹喜諂者見秀才不
望塵雅拜則曰歪提學使之罷輒者無能爲也則曰
強臣奪其權人卷畢集而推託者則曰畏李某而人
卷不易提解問賊官者不恠官之賊也則曰李某有
害人之心非惟不之恠顧又禮貌之唾罵者不唾罵
賊官也則曰舉賊官者可唾罵時事至此中夜拊膺
未始不流賈傳之涕而危巷伯之遭也古人邈矣試
論今人陳士賢曲克諸生有爲強盜者釋弗問也凡

上司咸莫敢諸生何敖靜之拳毆唐御史晉小試其
至挾刃而入唐御史發疽而死當時未嘗以奸以強
以歪以訐以害人以生事以尚氣加之也某無事也
而何以蒙是名也楊繼宗對人輒罵賊官不絕口凡
有事於其邦也則沿途伺察其動靜嘗以按察使朝
覲見藩司官封人事送人輒挾之并列已名嘗又任
意縱賊囚當時未聞謂之奸之強之歪之訐未聞謂
害人生事尚氣也雍世隆以臬使路辱知府爲都御
史則鞭叅將爲右轄時澗人惟知雍布政耳詞訟者
不復之臬司矣天下咸壯之不甚謂非某無事也今
其加我者矧又無形之謗而甚者如任漢所陳咸懸

空架捏初無影響幸賴皇天無私 太祖太宗二皇帝有靈孤臣寸心竟獲洗雪而勘官者乃不降心平氣開布至公猶欲他求中傷夫善人者國之經端大者天地之元氣也今顧爾爾矣而于其可摧可抑可廉可擊及一切收威柄而潛消跋扈之計則反畏蜀如虎莫之敢動也某嘗對勘官大言曰今諸項項勘畢矣然非元氣所係紀綱之關也必於激濁揚清之內而暗寓扶陽抑陰之義使彼知朝廷有不可罔之法天下有不可屈之節古今有敢爲之男子無能逃之貪吏然後能懾服勢雄係屬渙散潛泯亂階勘官曰慮有後話耳某曰夫燕卿者代 天子行者也大

理者持天下之平者也然猶慮有後詞則天下官不勘事邪彼不聽某退悔失言矣孔子曰不可與言而與之言失言彼意直欲保官耳夫士之見重於世者以人不以官以若所爲即使位極人臣封公封侯時衰運移一旦捐館亦與吾輩等矣傳之天下後世當云何矣激切踈鹵不文臨封悚慄

二

草莽中伏聞謝柄歸里卑懷無任喜慰比遇張生言眠食安健門客往來者如常也則又慰又喜某私計不謁杖屨奉道顏今十年餘矣雖耳聾目和昏神馳心注無殊曩昔然悲離隔慕親接於衷莫之寬也

壯歲性狂膽，龕高視，獨行四方，是負意之所拂。投冠
便往，以爲軒冕之耀，不若丘壑爲安。於是擬江左
再圖襄漢，心勇跡阻，竟還舊棲。才弱成寡，自鄙自嗤。
去年室人喪，亡子蠢孫孺，家事埤躬，顛毛漸種種矣。
夙志謂何，臨鏡竊嘆。邇卜域釣州大陽山，其地泉石
幽曠，想於茲焉。老矣南望門墻，豈勝瞻戀。

三

愚無似，然陶範懷德，景行慕履，真仰如日月，親如父
母，無日忘之。無時忘之。顧經霜逾暑，左右訊缺音，墨
載踈，斯窮居寡接，因循自阻之故，非敢忘大昧深安
下而恬汗也。年來自惟復駕焉，求之義杜門絕游，葺
室廬闢田園爲終焉計，然猶多口，是增身非娥眉羣
妬奚來，死生有命，聽之而已。戊寅之歲，再舉一兒，去
年一乳兩兒，皆幸生活，通家骨肉，敢附以聞。虞萬里
行草次布白，不勝惶懼。

四

張陶二客，比數往來，以是得聞起居，爲詳爲慰。某疑
似之跡，市虎成真，而勘臣遂以殺人媚人，爲心鉉織
窘辱無所不至。幸素翁當道，疑剖似解，不費言說，大
誣明釋。某嘗自鄙，亦嘗自幸。自鄙者，踈亢弗容于時
自幸者，元老碩公取爲要駕之馬，目爲磊砢之材也。
某反觀私計，平生不敢爲汗下苟且之行，即邁擠陷

不敢為門牆玷也

五

既見遽違瞻戀增劇心旌去旆搖搖共西伏念天生
李晟本為社稷朝有君實吏戒邊隙顧經綸早卷岩
壑淹棲塞塵既起廷論乃歸大相元宰老就金革窮
沙大漠殘城羸馬焦勞心骨想見先憂之容然秦隴
舊民伏威涵澤望公之來真如日月之照雨露之濡
斯所謂事半而功倍者也某少耽章句曲荷陶成迂
執忤時中歲淪斥無由操策轅門侍聆邊略然金鼓
之音旌旗之色恒若親之斯雖想像之餘懷亦聞見
之素心也委箋名作自慮知識蕪淺黑白或混青黃

白菑然命嚴意懇弗敢固遜緣節鉞過汴時內人暴
病夜警困瘁會風又襲之逾月始平諸帙校定涉秋
畢矣鄙詩二篇敢上左右非能步驟來章幸置贈什
卷末亦驥尾之附也聞有脇痛之疾事體定後想勿
藥矣伏惟強食節勞為社稷為生民自愛不宣

六

門生李某死罪死罪上言歸田錄四帙奉教勘定了
畢敢先馳以獻者竊念某身處堂下眼在管中乃敢
橫肆譏評點竄名作謬擇明珠瑕指定璧某誠死罪
死罪夫栗然之色不以指而損美者以其璧真也淵
然之尤不以擇而亡圓者以其珠神也我公神珠真

壁幸無怒于妄人轅門萬里無由質疑以聆緒日西
瞻太華吳岳之峻不勝仰望戀慕之至

七

伏念日者途館趨侍河舟登別踟蹰春野佇望風帆
感慨今昔衷曲悽惋憶在冲年獲叨鎔範萍蓬飄逐
忽焉衰暮公逾七袞愚過半百會不信宿復此違隔
人非木石誰堪此懷也大作十冊校定者九遺者自
訟豪耳愚嘗靜繹潛究推求旨緒西巡諸作矜持嚴
整大而未化立朝之作廊廟冠冕俊拔典則邊塞之
作忠誠奮揚規畫槩見歸田之作幽眇流行情真意
會變化百出矣揆厥原之者厚夫沛蘊深光淵故觸

之則發驅之則伏寫之無逸景用之無梗事鋪之無
留情遂使工辭者畏其渾淪負氣者讓其雄高攻意
者服其巧妙雖唐宋調雜今古格混瑜瑕歷掩軌步
罔一然所謂千慮一失者也一代名筆後必有知子
雲者縷縷之談未及而陳敢附此以聞

八

徐州使至知蒲輪北矣公之出處天下關之初公之
南也愚嘗私計出則利國處則利身且今夢傳卜尹
之秋孰能使公獨以身利哉夫治朝亦有雜進君子
不無異同今欲主張國是定雜為一合異為同非公
是利而將誰利哉往者公之柄政也議者謂公喜通

才獎辯給拔門士優故吏故其顯名高位者程事簿
書之夫多而雅裕鎮俗之徒寡爽快取辦之流揚而
先憂識微之士抑委曲活變之風行而守死執義之
心灰至今言官猶以此病公而不知道以正行事由
通濟聖人通天下之情達天下之變而後成天下之
亶亶夫日有中昃時有孟季愚嘗竊觀今天下之才
正德不如弘治弘治不如成化豈否泰消長生才有
高下邪抑有之而未用邪用之而未盡邪斯非後生
小子之所知亦非所宜言者以道義肉骨弗覺縷縷
至此大作四種五用勘檢各畢敢緘付來使以還企
瞻光範北斗在天斟酌元氣霖雨四海猷畝之氓伏

俟太平無任慰幸懼忤之至

九

十二月半問王承差齋教翰詩用至并獲災變陳言
之章 皇上慰諭之札竊嘆私幸連夜彌日嘆者遭
際之難而幸者夫子之道行也伏自 皇上入繼虛
心委政禮耆右儒孝敬恭默天下信之言 君有臣
愚安得不私爲之幸然必至誠而後動積久而後徵
於是又知遭際有難焉因念夫子秉蒞要樞建白彈
駁不止數十百章而精誠剴直該貫練徹格心明誼
指事正體無如此疏之大且切者斯所以 天聽回
而眷心注也仲舒三策光武十行今復見之太平之

業非我夫子而誰望哉所委勘檢屬年殘倥傯俟春
初完報耳夏方伯人便輒布此悚懼

十

歲事復更瞻望台斗戀慕愈切大製三冊勘合各畢
中間批評言語放肆去取嚴刻殊非事長事貴之禮
愚以爲託屬既專導誘復至使有懷弗罄不涉於欺
乎故寧言之而欠當不忍知之而弗言况由此有獲
教者乎是非可否無吝開示固愚者之幸也

與何子書二首

勘官以送門子造僞章一事與我無干乃反大懊恨
深其文鉤織如以釘釘木惟恐不入也然竟公罪無

奈何乃招擬還職而於參語則曲紐刻加務求合
官之文此亦甚足笑也僕靜觀性命之變窮通顯晦
斷斷有默定之數通顯卽無賴亦進用苟窮而晦叔
向柳下惠不獲免也以僕至公極廉脫寢富貴誠利
於國死生以之猶不免大惡之名之加他可知矣僕
此一言一動悉爲仇者所搜羅江御史搜羅者二吳
廷舉者一淮人者三然竟若斯焉矣僕私謂勘官勘
畢必酸心流涕痛我之冤而憤讒誑之易扇而今乃
反爾爾可笑也餘見文詩四月八日

二

勘事一二日畢矣而淹至三月廿五日始發回省城

候命下今寓城北玉虛觀也蓋是時赦丁巳又有使
之無引赦者而勘官遂不之引赦勘官初許只在廣
信候命下形諸言矣已又發回省城此亦有使之者
臨發第嘆曰斯非我意汝衆人所知耳僕今決長往
此等不足與較云云者欲君子知顛末耳家人尚謂
九江蓋俟僕同歸居鹿門耳自僕罹此難友朋多不
復通書問結交在急難徒好亦何益僕交游徧四海
矣赤心朋友惟世恩德涵與仲默耳其難如此可悲
可嘆同日

與李道夫書

僕婢直之性孤危之行皎然難白之心自護世無知

已矣矣乃幸而遇大君子者違群而顧汰沙而收訓
惜保獎日彌月增此真僕希曠之逢然君之信善弗
疑夷險靡貳即古大丈夫之事何加矣而隨場悲喜
寒燠異情者聞之尚有里閭之疑可詭也信之獄勘
者任私拷成蔑有理化無竟明之事無不究之民如
程伯者總司問而君詳而允者也勘文所不載勘者
羅織插入擬程伯求遠充軍而坐僕以故入此更不
可曉亦大可笑也蓋彼意止欲害僕初勢不啻山墜
然竟莫如何乃擬僕還職而於叅語則深文鉤陷迎
附彈者我命在天聽之而已復何言復何言獨念遠
逝甚邇無計縮地把臂一說用泄俛仰千古之懷耳

跋望光範曷勝愴惋有便不吝數寄則爲慰大矣

答左使王公書

更至奉魏牘檢豐貺詢所從來感刻深切嘆惋并至
僕自險難以來素號海內義氣友朋知己親舊不復
通一書者多矣而公獨以一日之雅乃千里遣使跋
艱泛泖出境致問申詞布悰此其介然之明毅然孤
往同聲必赴破衆而趨詎足與隨場悲喜逐波浮沉
者道邪傾蓋如故白頭如新豈不信哉竊念僕人雖
蕪鄙志不安下顧內愈精而外愈疑心耿耿而踪歷
白嘗自負丈夫在世必不以富貴死生毀譽動心而
後天下事可濟也於是義所當往違群不恤豪勢苟

加去就以之不意時體不然哄然排笑吠聲射影
成大獄君子不怨天不尤人凡此咸僕忠誠未孚於
人而倖直不慮其後所致即使時論優容而如僕者
終豈用世之才不敢更覲行列塞賢路也今諸謗幸
頰洗雪白矣即日揚孤帆泝江漢入鹿門偃仰丹壑
觀諸大君子太平德業之盛而霑其餘休斯志望
卑矣然此隱懷也不敢轉告人而今吐露於公者以
有鍾子之知蒙歎樂之顧者也來更謹敏能悉公官
履嘉大之詳瞻佇景輝不勝躑躅不宣

報吳獻臣書

雄章珍餌孤使遠馳仰知公有至意焉奉誦什襲與

心俱藏也。比來尚無消息，僕今手纜以待消息來便開也。別後沿途采詢，謠議士人頗不以僕輩爲非而不知者，猶謂僕矜已凌儕而謂公附炎忌才，此甚可笑也。僕與公雖幸並生明盛之世，共有海內之名，而往昔邂逅湖東，交衽接席，談不逾日，竒情未諒，各負氣不下，致生異同。此亦古今豪傑之常，而僕之過執靡遜，自遂往顧，厥咎孔焉。然於心無它也。患難相值，風萍偶聚，頭攢耳摩，臥起相聞，酒食延呼，數月之間，兩襟遽豁，轉爲綢繆，前何以戾，今何以歡，隱衷忤懷，彼此獨知矣。來詩云：夫旣違顏面，豈不愜素心。如何異同論，三兩相差。參君誠子淵儔，而我非孔壬辭旨。

效實所謂言不違心者也。第子淵擬僕則似過耳，臨徂有日，悵念風義，爰爲放歌一章，輒煩來使，毋曰反之而後和也。

與王獻可書

人至奉書狀，備論接遘，大憂彌年在疚，顏形可知也。蒙以銘文見托，委非其人，潛光何闡，顧通家肉骨義畜，効力千里，馳使勢難固辭。然僕謂凡文必據大體，有氣象是故，瑣屑尋常一切剗刈，銘文中間不無筆削，斯以意會可耳。八世敬仲大名畢萬，恐費搜索，輒附以聞。

空同先生集卷第六十二

空同先生集卷第六十三

北郡李夢陽撰

文 祭文一十八首

九江謁濂溪先生祠告文

蘇先生入白鹿洞先賢祠告文

丘先生祭文 熊士選祭文

周副使祭文 左公墓祭文

汪世興祭文 延平同知閻公祭文

王汝隣祭文 林元佐祭文

李員外祭文 余員外祭文

馮照磨祭文 祭鮑子文